



Salut e augures del Procurador

Volesse durèr l'ocazion del ultim boletin del an per fèr vèlch conscidrazion sun chel che aon vivù via per l'2022 e, tel fèr chest tant, recordèr vèlch un di evenc che ne à tocià con dejèstres e manconies.

La desgrazia de la Marmolèda, con i morc e i padimenc che la se à tout do, e la roes che à caujà dans e cruzies de chest istà, ne met tedant a na Natura che la é do che la ne domana l'cont per l'fat de aer metù al zenter de noscia vita l'svilup e la crescimonia senza limic e condizions.

La vida aboncont coche noscia Comunanza ge à fat front, ne dèsc na speranza.

La modalità de coche l'é entervegnù i sacotenc operadores te chi momenc tragics l'é la proa del endrez, de la profesionalità e de l'operatività de nosc sistem de protezion zivila. Chest ne dèsc segurezza. Ma saer che la gran pèrt de la persones che se à dat ju l'é voluntadives, ne conferma l'fat che la noscia l'é na Comunanza che, dant amò che con mesi e regoles, la se tegn ensema con valores e ideèi. E chest ne dèsc speranza.

Solidarietà, umanità, capacità de se tor su

responsabilità e de fèr sacrificies, ensoma, fèr sia pèrt, l'é i pilèstres più staites sun chi che pel se pojà na sozietà e l'é chi prinzipies e chela calitèdes che à ispirà e animà i sacotenc voluntères e la scempia persones che 'à dat da na man'.

L'é belapontin noscia speranza e noscia forza

per ge fèr front con fiduzia al davegnir!

La testimonianza che ne é stat dat, ge dèsc amò più significat ai

Augures de n seren Nadèl e de n bon 2023!

Giuseppe Detomas, Procurador



L Consei de procura

Giuseppe Detomas - Procurador:
afares generèi e istituzionèi; personal;
e-mail: procurador@cgf.tn.it

Riccardo Donei
Bilanz; gestions sozietàes; turism; comerz
riccardo.donei@cgf.tn.it


Giorgio Dorich
Trasporc; troes; coord. politiches sport
giorgio.dorich@cgf.tn.it

Mirella Florian
Sozièl; derit al studie; volontariat; 1^
cèsa
mirella.florian@cgf.tn.it

Carlo Ganz
urbanistica; lurieres publics; patrimonie;
carlo.ganz@cgf.tn.it

Martina Pederiva
Ambient; ecologia; gestion refudam
martina.pederiva@cgf.tn.it

Amedeo Valentini
Inovazion; cultura; polit. lengaz e joegn
amedeo.valentini@cgf.tn.it



L Nadèl ne libre dal mèl de l'indiferenza e del egoism e l ne deide a esser davejin a nesc frèdes ogne dì te azions e pensieres. L An Nef ne porte pèsc, percheche ogne vera l'é na desfata per duta l'umanità.

L Procurador e dut l Consei de procura

Servijes e Ofizies

Canzelaria e secretariat
Telefon segreteria: 0462 764500 int. 1
Fax per duc i ofizies: 0462 763046
e-mail: segreteria@cgf.tn.it
Pec per duc i ofizies: pec.cgf@pec.comungeneraldefascia.tn.it

Contabilità, Finanza e Personal
tel int.: 6 Ragioneria; int. 7 Personal
e-mail: ragioneria@cgf.tn.it;
personale@cgf.tn.it

Afaires Generèi, Servijes informatics e informatives e Assistenza Scolastica
Tel.: 0462 764500 int. 2
e-mail: affari.general@cgf.tn.it

Igiene urbana e ambientèla
Tel.: 0462 764500 int. 5
e-mail: ambiente@cgf.tn.it

Servijes linguistics e culturèi
Tel.: 0462 764500 int. 4
e-mail: cultura@cgf.tn.it

Servijes sozio-assistenzial
Tel.: 0462 764297
e-mail: sociale@cgf.tn.it

Servijes tecnics frabica e urbanistica
Tel.: 0462 764500 int. 3
e-mail: tecnico@cgf.tn.it

Portel informatif PAT
Tel.: 0462 763505
e-mail: mariano.rasom@provincia.tn.it

Volon n servije sanitàer percacent e efizient

Da mingol de temp sui sfões se reiona del ospedèl de Ciavaleis per chel che al scomenz l'era pervedù na restrutturazion da pèrt de la Provincia de Trent e enzeve do, presciapèch acà doi egn, a la medema PAT ge é ruà na proponeta partenariat publich privat (PPP) per fèr su n ospedèl nef a Masi de Ciavaleis.

Che se entel per PPP partenariat publich privat? En curt, n soget privat fèsc su na infrastruttura che l'ge conzet en gestion al Ent publich, te chest cajo a l'Azienda Sanitàer, che l'lo gestirà con n paament de n canone anuèl per dapò, do n trat de egn, l'rescatèr e donca l'comprèr definitivamenter.

Descheche l'é pervedù da la normes en materia, l'PPP l'é stat verificà e analisà da na comiscion provinzièla aposta che à inom NAVIP. Do beleche doi egn de lurier la comiscion à stabèl che l'projet passenea coi besognes publics sot desvalives ponc de veduda (funzionèi, economics, finanziaèi e c.i.).

La setemèna passèda la Jonta de la Provincia de Trent à declarà l'enteres publich' de la scomenzadiva che permet che vegne envià via la programazion del intervent, a chel che la medema Jonta vel ge meter apede na consultazion di 'teritories' - amministradores e sentadins - a na vida che i se palese su la doi alternatives: restrutturazion de chel che l'é jà o realizazion de n nef ospedèl.

Per endèna la documentazion tecnica/finanziaèla/economica del PPP no ge é amò stata data a la amministrazioni e no l'é amò a la leta nience la documentazion che revèrda

la restrutturazion del ospedèl de Ciavaleis. Per chest no l'é possibol fèr la valutazioni, semper che nesc enc publics abie la cognoscenzes e competenzes tecniches adatèdes per ejaminèr projec coscita gregn e soraldut tecnics.

Peisse che a nesc sentadins e amministradores ge enteresse servijes sanitàeres percacenc e efizient, che sie bogh de responer ai besognes de la jent per temp e con competenza.

Purampò i segnèi che ne rua no ne lascia otimisè; apede ai tempes lonc te la prenotazioni al CUP per vijites e ejames, se lec sui sfões che adertura i dotores manacea l' scioper, per denunzièr la situazion de mencióna de personal, per via de schèrsa atratività e demiscions.

L'Comun General de Fascia é stat chiamà en audizion al prum de dezember del 2022 te la Quarta Comiscion del Consei Provinzial per saer che che l'peissa sul aspet del PPP e é abù

l'onor e l'encèria de sostituìr l'Procurador.

Te chesta ocasion é palesà cruzie per la situazion atuèla del servije sanitarie provinzièl che, en generèl, moscia situazioni critiche che cogn troèr soluzion. Amò apede é metù al luster coche la strutures periferiches e dalonc dai zentres, e i servijes che les sporc, cogne vegnir potenzié.

L' sentadin domana n servije sanitàer percacent e efizient, speton donca te tempes curc determinazioni de la Jonta provinzièla sui gregn projec infrastrutturèi desche chel del ospedèl de Fiem, che domana temp per la realizazion, tegnan cont che la sanità l'é n setor che no pel spetèr l'ejit de discusions che no à nia a che fèr con la sostanza de la proponetes tel setor medich.

Renato Nazario Micheluzzi
Vize Procurador



N deelpai e n augurie de cher

Cara fascènes e cari fascegn,

te mingol l'é Nadèl e dessema ai augures de vigni ben, sanità, legrezza, bona voa tel viver de duc i dis, te cèsa, sul lurier e te anter la jent ence n augurie per l'An che vegn che l'sie mior che chel passà e che dassen posse esser pèsc te dut l'mond, perché ogne vera l'é na desfata de duta l'umanità.

Voi ringrazièr la jent che laora te duc i ofizies del Comun General de Fascia e en particulèr la assistentes sozièles e la assistentes che deida la jent te cèsa e duc chi che se dèsc ju ti setores de delega che me é stat dat su al scomenz de chest mandat per la colaborazion che i me dèsc per arjonjer i

obietives che chesta aministrazion se à metù dant. Dut l'lurier che i fèsc con pascion e competenza l'serf per ge arseguerèr l'bonstèr a noscia comunanza e donca spere che l'sie dassen aprijà da la jent de Fascia.

N deelpai de cher ence a duta chela istituzions che à colaborà chest an col Servije Sozièl, ai membres del Consei de Procura, del Consei General del Comun General de Fascia, al Consei General de l'educazion e de la formazion, ai Comuns, a la Assessorès al Sozièl, a l'Union di Ladins, a la Scola Ladina, a la Piovanes de Fascia, a l'APT de Fascia, a duc i enc del Terz Setor, al CSV de Trent, a duta la sociazions de volontariat

e a duc i enc, publics e privac, che i é stac touc ite te vèlch scomenzadiva.

Te chesta fin del an, do i augures e i ringraziemenc, me sà bel e de utol spartir co la jent de Fascia l'bilanz sui projec e la desvaliva scomenzadives fac tel ciamp sozièl ma ence per dèr l met de cognoscer miec chesta istituzion.

Donca bona letura e palese mia desponibilità a tor su proponetes neves che la jent vel fèr. N gran braciacol a duc!

Mirella Florian
Conseiera de procura al sozièl



Che fèjel l Servije Sozièl?

Dantaldut volon ge recordèr a la jent de Fascia la competenzes che l' à l Servije Sozièl del Comun General de Fascia, chest per entener miec l lurier che vegn fat acioche la jent posse se emprevaler semper de più di servijes sporc. La lege provinzièla dai 27 de messèl del 2007, n. 13 "Politiches sozièles te la Provinzia de Trent" ge dèsc su competenza dreta de la funzioms sozio-assistenzieles al Comun General de Fascia.

L servije te sie mandat istituzionèl met en esser ocasions per miorèr la condizions de vita de la persona, de la families, di gropes, de la comunitèdes e de sia desvaliva unions sozièles; l valorisea l'autonomia de la persones, sia sogetività e sia capacità de se tor su responsabilitèdes, les didan a durèr sia ressorses e cheles de la sozietà, per prevegnir e ge fèr front a situazions de besegn o de dejèje e didèr i prozesc de inclusion.

Apede chisc intervenc emportanc en favor de persones o families che padesc situazions ence temporanes de stenta, l'é ence duc i intervenc de promozion e prevenzion sozièla che vegn metù a jir per formèr i sentadins e i meter de più en consaputa del stat reèl de "sanità e bonstèr" de la comunanza.

Sostegn per la formazion del personal

La pandemia, da chela che no sion amò fora deldut, l' à lascià gran dificolitèdes tel endrez ti servijes sporc sul teritorie, ajache chisc servijes stenta a jir inant a na vida percacenta a cajon de la mencióna de personal sozio-sanitèr e infermieristich. Vedù che mencióna personal tel setor sanitèr, zis emportant per l bonstèr de noscia jent, e per engaisèr i joegn e manco joegn, la femenes e i omegn, a se emprevaler

de chesta oportunità de formazion e de lurier, l' Consei de Procura, te la sentèda dai 9 de setember del 2022, l' à pervedù n pest de € 1.200,00 da ge dèr ai sentadins de Fascia che, do aer fat l cors e l tirocinie, i arà la califica de Operator Sozio Sanitèr per do jir a lurèr ti servijes che l' é sun nosc tegnir. Amò apede l Servije Sozio Assistenzièl l se à metù a la leta per sostegnir i corsisc che stèsc te Fascia endèna l percors de formazion con scontrèdes de sostegn e de motivazion, estra che per tor dant chi che fèsc tirocinie. La doi azions les é states pervedudes per sostegnir e didèr dalbon la persones che vel lurèr tel ciamp sanitèr.

A stèr ben te la comunanza se scomenza da picoi

Se ge à dedicà n'atenzion particulèra a

la Scola Ladina, segures che lurèr per la formazion de la generazions più joenes fèsc crescer duta la comunanza, che a chesta vida la sarà bona de ge fèr front ence ai neves problemes sozièi. De setember se à serà su l projet "Stèr ben a scola", de chel che aon jà scrit tel boletin de chest'aisciuda. Chest an l' é stat proponet de jir inant col projet su la Giustizia de reparazion a na vida che la scola dovente na Scola de Reparazion.

Amò apede l Comun General de Fascia l' é partner del projet de inclusion per i bec ucrains che à inom "Benvegnui" finanzia da la Fondazione Caritro e a chel che tol pèrt ence la Crousc Checena desche ent a cef del projet, la Scola Ladina, la Sociazion Antermoia, la Scola de musega "Il Pentagono".

La azions del percors Anteveder



Tel ultim boletin aane contà zeche sul percors de pianificazion sozièla "Anteveder" che te chisc meis l' à fat de etres vèsc de gran emportanza, e en particulèr do aer scutà l teritorie l' é vegnù fora valguna prioritèdes de intervent che vidarà l'aministrazion te chesta legislatura. Tel chèder chiò apede podede lejer na sumèda en curt de chel che l' é vegnù fora, ma ti meis che vegn ve metaré en consaputa de coche chest percors de partecipazion jirà inant.

Tras l'percors "Anteveder", metù a jir ti meis passè, l Servije Sozio-assistenzieles del Comun General de Fascia à enrescì e studià fora i besognes de la comunanza col zil de sporjer responetes concretes, neves e inovatives ai problemes troé fora, ence col meter en esser rees del teritorie e cordanzes istituzionèles. Chest percors, aldèla de la redazion del Pian Sozièl de Comunità emportant percheche l vidarà la ativitèdes de chesta aministrazion enscin a la fin del mandat, l' à metù al luster besognes e condizions critiches de noscia comunanza che i é stac ence descroec fora coi Ombolec, co la Assessorès al sozièl e col Consei de procura.

La arees de referiment sun cheles che l' é

debesegn de lurèr per programèr e meter en pe la azions che pel responer ai besognes vegnù fora dal persors de partecipazion les é 5:

1. Cèsa

- l'azes a la cèsa de joegn solarins e familia joenes
- l'autonomia abitativa de la persones con disabilità e/o te na condizion de dejèje sozièl
- la desponibilità de cartieres per i profesionisc e i operadores sozio-sanitères

2. Se tor cura

- i spazies de autonomia te la vita da duc i dis de la persones pedimentèdes
- la mencióna de servijes per persones de età no deldut autonomes
- l'peis de la fadia di caregiver i servijes leé a la fin de la vita per i malé e sia families
- la prevenzion de la debolezes mentèles leèdes a la jent de età
- i servijes a sostegn de la malaties e del dejèje psichich

3. Educchèr

- i servijes de conziliazion
- l'abus de alcol e droghes



- la fadies psico-sozièles
- i spazies per socialisèr e per se troèr per touc

4. Lurèr

- l'orientament scolastich e profesionèl, ence per i più touc più joegn
- la rees anter profit e non profit per renforzèr la ocasions de ruèr ite tel mondo del lurier
- la gran mencióna de personal (ence tel ciamp soziosanitèr)

- i neet (i joegn che no laora e no studia)
- i joegn che no vegn de return te val

5. Comunanza

- fèr fadia a domaner aiut e se fèr didèr
- cognoscer pech i servijes e la ocasions de cheles che se pel se emprevaler
- stentèr a troèr endodanef ocasions per se fèr ite anter la jent, soraldut da pèrt de chi più de età
- i conflic te cèsa e la spartijons sozièles



N muie de projec e evenc per tor ite duc



Apede a la ativitèdes jà dites, l Servije sozièl del Comun General de Fascia l à portà te Fascia ai 25 de otober la Sociazion Parkinson de Trent, per ge dèr al met a chi che vif chesta condizion de cognoscer la ativitèdes che vegn metù a jir per didèr a miorèr la vita, ma ence per saer che no se é soi, che l é emportant spartir coi etres la esperienzes de vita. A la scontrèda à rejonà la Presidenta Andreanna Bayr e l dottor Claudio Boninsegna, neurologh.

L é stat tout su ence chest an la proponetes de la LILT per la sensibilizazion a la prevenzion del tumor al piet tras la campagna Nastro Rosa e a la campagna de prevenzion di tumores di omegn co la campagna Percorso Azzurro.

La Di internazionèla contra la violenza su la eles l'à dat l met de meter en pe na colaborazion rica e percacenta co la Sociazion de teater Antermoia e coi Comuns de Mazin e Cianacei e de portèr te Val n spetacol de teater cognosciù a level nazonèl "Il nome potete metterlo voi" scrit e spilenà da Mauro Monni co la compagnia toscana Sine qua non.

Chest an an volù recordèr ence la di su la desvalianza, che la é ai 3 de dezember, con na scomenzadiva per sensibilisèr la comunanza dintornvia chest argoment. L é stat metù ensema n grop de lurier co la Conseiera de Procura Mirella Florian, l'assistenta sozièla Cipriana Tomaselli,

Mattia Desilvestro, Rosanna Verra e Vanessa Winterle. L Servije sozièl se à pojà sul didament di consulenc Imago Garage per enjgnèr l material de chesta sensibilizazion. Ai 4 de dezember aló dal PalaDolomites de Mazin l é stat portà dant chel che l é stat fat.

Rosanna Verra à scrit na ciantia co la musega metuda ju dal grop Cianton da marevea che à fat n bel concert. La Conseiera de Procura à volù tor ite ence i bec da la scolines de Cianacei, Pera e Soraga che i à registrà la bela ciantia "Cianzon de Olga" co la paroles e la musega de la maestres Roberta Deluca e Maria Grazia Spinel. L é stat fat ence de bie dessegnes per chesta ciantia.

L azet ai enfughé da l'Ucraina

Chel che l é stat fat via per l 2022 l à sopi trop i efec de la vera e l Servije sozièl te chisc meis se à dat ju acioche i enfughé rué te Fascia i posse se fèr ite te la comunanza. Via per l istà l é jit inant desvaliva scomenzadives, dedichèdes soralut ai bec ucrains, che l CGF à finanzia e endrezà, col didament de la Coprativa Progetto 92, col endrezèr ativitèdes de jech e socializazion a cheles che à tout pèrt ence bec enciasé te Fascia. Da la seconda setemèna de messèl enscin ai 19 de aost n grop de presciapèch 20 bec, anter ucrains e fascegn, se à binà, compagné da Nives Iori e Nataliya Zemlenski, aló da la veia scola populèra



de Poza olache i à podù viver momenc de legrezza te desvaliva ativitèdes a l'averta. De gra al sostegn de n muie de firmes de la Val chisc bec i à podù fèr de bela esperienzes de amicizia e de cognosca de nosc teritorie. N develpai de cher a la sozietèdes Bufaure e Ciampedie, al Acropark, al Minigolf, al Museo Ladin, a la Mèlga de Fascia, al Refug Pra Martin, al Masc Alocho, a la Scuola de Polizia de Moena. Chest l é stat possibil ence de gra a la doi animatores che con gaissa e bela idees les à sapù portèr inant chest projet de integrazion anter i bec fascegn e chi ucrains.

Chest an l tem de la Setemana del azet l é stat "Esser comunanza: duc i colores del azet" e l Comun General l à tout pèrt ai 5 e ai 7 de otober con scomenzadives per valorisèr la fradaa desmostrèda da Fascia jà dal scomenz de la vera en Ucraina. La sera dai 5 de otober l é stat la scomenzadiva "Ge dajon ouc al azet" olache i protagonisè del azet à podù contèr sia esperienza e coche la persones ucraines les é states toutes ite te noscia comunanza.

Per i "I colores del azet" l é stat tout ite i studenc del Liceo Artistich che i à fat na bela performance sul azet. L prof. Stefano Aloe de l'Università de Verona à fat n referat sul tem "Ucraina: na cultura europeèna pech

cognosciuda". La setemèna se à serà su con na festa per i enfughé, per la families che ge à dat alberch e per i voluntadives che à lurà e laora amò anchecondi per l azet.

L develpai per la solidarietà

Per didèr la families de Fascia te la situazion economica senestra de chisc meis, l Consei de Procura al scomenz de setember l à aproà n avis per dèr fora contribuc per l fit e la speises de cèsa. L é stat binà su 34 domanes e l é stat dat fora en dut 19.800 euro de didament economic.

Seron su chest referat col gran develpai e la recognosca che l Comun General de Fascia vel ge palesèr a duc i voluntèdes de Fascia che vidé da la solidarietà, dal altruism, dal estro de didèr chi che fèsc fadia i met a la leta sie temp, sia competenzes e sie naturèl, estra che esser n ejempie concret per la neva generazions. I Studafèch, i Voluntèdes de la Crousc Checena e de la Crousc Biencia, i membres del Socors da mont e i voluntèdes de duta la sociazions del Terz Setor, che te noscia tera les é dassen tropes, i fèsc doventèr miora noscia sozietà.

Develpai!



SPAZIE ARJENT

La reforma del WELFARE PER LA JENT DE ETÀ la menarà dal 2023 ence te Fascia a envièr via n nef endrez per i servijes per la jent sora i 65 egn e che l arà inom spazio argento/spazie arjent.

Se trata de n servije che l perveit na gran integrazion sozio-sanitèra e che ge dajarà l met ai sentandins de troèr te un lech soul responetes prezises ai desvalives besegnes de assistenza, con chela de creèr n coleament fort no demò coi servijes istituzionèi, ma con duta la rei più slarièda fora del sociazionism e del volontariat che pel desvaliva rejons pel revardèr la jent de età. Via per l an e a una col Pian provinzièl demenzes de la XVI Legislatura l é stat metù a jir desvaliva scomenzadives de sensibilizazion dintornvia l tem de la

demenza e sul vegnir veies a na vida ativa. Va inant ogne setemèna la ativitèdes di Zentres per stèr ensema e i apuntamenc del projet "AttivaMente".

Chest uton l é stat sacotanta proponetes per tor ite la comunanza tras tematiche trasversèles desche la scontrèda col architè-urbanist Alessandro Franceschini, dozent de l'Università de Trent, sul tem "Projetèr n paisc adatà a la persones scherpentès", l seminèr co la dotora Stefania Folloni, medica e nutrizionista, sul tem "Magnèr delvers, doventèr veies a na vida miora", l laboratorie con Francesca Dellagiacomà, operatore shiatzu, sul tem "L passèr del temp te la filosofies orientèles: doventèr veies con equilibrie e saer".



La fotografies te la piata apede ne moscia momenc de la scontrèdes di gropes de lurier che se à binà per studièr fora i besegnes de la comunanza e la azions che duc adum se pel meter a jir. Te chesta piata: en aut l spetacol contra la violenza su la eles e la scontrèda su la desabilità; chiò de sora la bezes ucraines a la festa te tendon e la scontrèdes te la setemèna del azet.

Teater per stèr adum

La rassegna de teater che vegn metù a jir dal Comun General de Fascia ogne doi egn l'è l'bel resultat arjont de gra a l'Aisciuda Ladina 2017, apontin dedichèda a la bela èrt del teater che vegn portà inant con gaissa e gust dai gropes de teater de duta Fascia



Enlouta, a una con duc i gropes, l'era stat pissà e do decidù de endrezèr n event ogne doi egn desche apuntament per duta la compagnia de teater de Fascia che per l'ocasion pel se scontrèr, se moscèr e se baratèr esperienzes, ma ence desche moment de festa che la Aministrazion de Fascia vel ge resservèr e ge recognoscer a chisc gropes de chi che fèsc pèrt demò volontères, che, do vea e te sie temp ledech, se cruzia de se troèr fora n toch de teater, o de se l'pissèr, de l'traslatèr e do de l'emparèr adiment per poder jir a proa e endrezèr n moment de spettacol che ge porte spas, svampol a duta sia comunanza.

Enscin ades purampò se à podù meter a jir chest event demò per una edizion, chela del 2018, ajache del 2020, canche fossa stat la seconda edizion de la rassegna de teater, l'è crepà fora l'Covid che à obligà duc a se fermèr. Ma chest de segur no à destudà ju la voa e l'gust de nesc atores, che cò i à podù e ge è stat domanà de tor pèrt a la rassegna de teater 2022 i se à metù subito a la leta con sbunf e gaissa per ge dèr amò luster ai teatres de Fascia. E belapontin ai 18 de november l'è peà via la Rassegna de teater 2022 che è jita inant per n meis e a chela che à tout pèrt i Bontemponi da Poza

co la comedia da grignèr "I più bie regai no se i fasc ite mai" de Loredana Cont, la Mizacoles da Ciampedel co la comedia da grignèr "La tradida dessenèda" de Davide Arminio, i Amisc del teater da Moena co na comedia scritta da Ilaria Chiochetti "Jiar col föch" e la sociazion Antermoia de Mazin col spettacol vegnù fora da n laboratorio de teater per jent grana enjignà su tesè de Achille Campanile e pissà da Michela Marangoni.

Spilenèr vel dir comunicazion de la

emozion e confront, l'è na vida gustegola e originèla per dir fora sentimenc, per insegnèr, per endeletèr i etres ma ence per cognoscer e emparèr neves lengac, neva paroles e l teater doventa n lech olache ogne un de nos pel doventèr pèrt de la stories che vegn portà dant sun paladina e lech olà spartir na esperienza magica. Te chest cajo l' lengaz ladin te teater doventa n strument de comunicazion fort che palesa la identità de n popul, stolz e rich de storia e de cultura sciantiva. Poder spilenèr per

lengaz mère segur per nesc gropes de teater l'è vèlch che li caraterisea, doventa n strument per rejonèr con sia jent, per se arvejinèr a sia jent, doventa n moment olache la storia da zacan se mesceida coi dis de anchecondi, olache vegn soscedà l' sentiment de partegnuda.

Viva l teater ladin!

Loreta Florian
Serviiies Linguistics e Culturèi CGF



L Pian Organich de Politica linguistica

Mie intervent l'è tacà ite con n ringraziament per l' lurier portà inant a la colaboradores di ofizies del Servije Linguistich del Comun General de Fascia a scomenzèr da la dotora Evelyn Bortolotti responsabola del servije e a Loreta Florian, Doris Valentini, Annarita Lollo, Sabrina Riz e Angela Pederiva. È volù spezifichèr che no se à tratà demò de n ringraziament de ocasion, ma de n aprijiamet concret per sie lurier e sia idees che ge dèsc vita concretamente al pian de politica linguistica e culturèla.

Sobito do ge è sport l' de velpai ence ai membres de la Consulta Ladina che à lurà per valutèr l' Pian Organich 2023, i projet proponec, l' sostegn a la sociazion culturèles sul teritorie e l' svilup de rejonamenc per pianifichèr la politiches linguistiches e culturèles che l' ent jirà a svilupèr ti egn che vegn.

L Pian Organich, descheche à palesà la Consulta Ladina medema, no l'è demò n rendicont finanziarie che moscia la entrèdes e la sortides che l' ent se met dant de fèr per l' an 2023, ma se trata de n document n muie più emportant percheche l' segna n pian de svilup e pianificazion de la politiches linguistiches e culturèles che l' Comun General de Fascia enten portèr dant ti egn che vegn.

Jan ite tel detai l'è stat metù dant soraldut la fontènes de finanziament al pian, che rua en pèrt dal fondo perequatif del CGF ex art 6 c5 L.P. 36/1993; en pèrt da la PAT ex art 24 L.P. 6/2008 letra A – pian de l' informazion, letra D fondo per la defendura de la mendranzes; da la Region Trentin Südtirol descheche l'è

stabelì dal D.P.G.R. 61/2018 art 6.

Te la pèrt I l'è stat metù ite la ativitèdes permanentes de informazion desche la stampa, programes radio e audiovisives e sia sumes de finanziament spartides fora aldò de la desvaliva fontèdes de finanziament. Chiò l'è emportant sotlineèr che sul capitol che revèrda la produzion audiovisives l'è stat finanzia fondi en previjion de la produzion de nef material video che pel esser de utol a fins didatics ma no demò, che pel vegnir ciareà ence online e sui canai social, e n potenziament del setor web per ge jir



encontra a la tendenza de comunicazion atuèla, l'obietif de veicolèr l' lengaz ladin a la neva generazioni con strumenc adatè e daldidanché.

L'è stat endò confermà ence i finanziament a sostegn di evenc identitères, tolan su apede a la Festa del Ringraziament, la sègra de Sèn'Ugèna e l' Carnascèr Ladin ence la defilèda de la Gran Festa da d'Istà. Amò apede l'è stat metù ite na menzion particulèra ai ric da d'invern per sostegnir chisc momenc culturèi emportanc desche Sèn Nicolò, i Trei Rees e etres. L'è stat palesà la volontà de meter endò a jir scomenzadives

de promozion linguistica endrezèdes dal ent medemo e ence scomenzadives de promozion inter ladina lascèdes su ti egn 2021/2022 per la pandemia.

Te la pèrt II l'è stat metù ite la 15 domanes de finanziament per projec de valuta per la cultura ladina manèdes ite per l' an 2023 e la sumes che la Consulta à decidù de dèr fora a sostegn de chestes per n total de 60.300,00 euro, 20.000 euro de più respet al an passà e l' contribut conzedù a la sociazion culturèla Union di Ladins per la ativitèdes che la fèsc sul teritorie.

Tinultima **te la pèrt III** l'è stat metù ite i contribuc ordenères conzedui a sostegn de la sociazions culturèles del teritorie che à fat domanà aldò de chel che à decidù la Consulta Ladina. L'è stat dat fora contribuc a 23 sociazions per n total de 39.400,00 euro.

L' Pian Organich de intervenc de Politica Linguistica e Culturèla an 2023 l'è n document rich e ben strutturà, de sostanza e desferenzià te sia proponetes che vel sostegnir più che l' pel e miec che l' pel la cultura e l' lengaz ladin, sie sparpagnament e sia doura pratega. Se trata de n pian emportant da 479.700,00 euro, suma che fèsc veder l' empegn e la volontà de duc per voler portèr inant chesta encèria per garantir al lengaz e a la cultura ladina na prospetiva de valuta.

Amedeo Valentini
Conseier de procura a la cultura ladina e i joegn

Jir te bosch no l é mai stat scì bel

Va inant la regoeta de "Entener e se fèr entener" di Serviies Linguistics e Culturèi del Comun General de Fascia dedichèda al bosch, che la vegnarà portèda dant d'aisciuda

Ma che velei dir "Entener e se fèr entener"? Dantaldut se fèr entener per ladin, e l uzèr fora acioche duc, ence la jent foresta, posse dalbon entener che chest l é n popul de mendranza che ge vel ben a sie lengaz, che à a cher sie teritorie e che no vel desmentier sia usanzas.

L é picoi librec che se caraterisea per sia semplicità: semplicità te la foja, ti colores e tel portèr dant i argomenc, che ampò i é concrec e atuèi. I pel dèr consees, recordèr regoles emportantes, tor ju l polver da paroles encomai desmentiedes, o esser na rejon per engaisèr na fona reflexion dintornvia sacotenc argomenc. No l é out demò a la jent dal post, ma ence a chi che vegn da foradecà: belapontin chisc codejie i é stac traslaté per talian, ingleis e todesch, acioche ence chi che no rejon fascian e che i vegn te val per se passèr de bela feries o per lurèr de sajón, i posse se sentir a cèsa e



pèrt de noscia comunanza.

Amò apede, de gra a la grafica neta e scempia pissèda da Giuditta Soraperra, caraterisèda da dessegnes gustegoi olache doi colores dominanc desferenzia na

edizion da l'otra, pel esser ence n strument didatich da durèr te scola.

Ma vegnon ades a chesta neva edizion, nasciuda de gra a la gran enrescida de Luciana Detomas olache l é stat binà ensema sacotenc vocaboi del bosch desche la besties, i ucie, la piantes e i èrc da boschier. Fosc per via de chel vel de mister che se scon vindedò i èlbres, l bosch l à semper ispirà autores e scitores, tant da dezider de contèr sia patofies apontin tel bosch.

Chest liber no vel esser scientifich, ma compagnèr la jent te bosch a na vida desferenta, fona e sciantiva e a se lascèr vidèr dai cinch sens. Nos, fosc, bele usé a viver te posé da marevea, con crepes spavides, bosé encanté, pre verc o corri da n mantel solvech de neif, no ge abadon più trop a chela picola cosses maraveuses che vigni di aon dedant ai eies, magari ence

per via de la routine che ogne di la doventa semper più desnechetèda.

Speta n moment, fermete, respira e lascete encantèr da chel che te ès dintorn con eies desferenc e più ascorc: aeeste abadà che l é na schieratola che te fita da n pez da te anter la dasces?

Ge volessa che duc nos tolassane consaputa che no se pel dèr nia per segur e no ge vel se spetèr che dut reste semper medemo. Soraldut do l tormen Vaia e do duta la ultima tempestèdes entravegnudes te nosc raion, aon podù entener delvers che nesc bosé l é n melaur prezious e l é nosc doer i stravardèr di per di.

Averjé i ujes ai cinch sens, e chel che timpurama pel someèr demò acort, l ve maravearà col ve contèr sacotenc secrec...

Annarita Lollo

Serviies Linguistics e Culturèi CGF

La Risola: projec di joegn per i joegn

Temp de bilanzes a la Risola, anzi na. Temp de programazion per l an che vegn, con i grignoc de nesc 'bec' ben stampé tel cher, e la voa de fèr per ic, de fèr con ic, n auter an pien de adventures, possibilitèdes de renasciuda, amicizies e de davegnir



Chel che porta inant l Pian de Joegn de Zona te sie teritorie de referiment no l é neto nia na costion de retorica.

L é n balanzament cert de mediazion anter la ressorces de noscia Provinzia e che i Comuns travers l Comun General de Fascia met a la leta ogne an, n grop de persones (aministradores e insegnanc, psicologs, educadores, genitores e joegn) che se dèsc ju per capir co endrezèr i contegnidores projetuèi olà meter chesta ressorces, e l gran lurier de la sociazions, de la copratives e di gropes informai, che dapò chela ressorces les dora con i joegn, per projec che fèsc crescer duc.

N ejempie? Chest an ve n dae cater!

- N percors de formazion per durèr l mond di social, che jà da vèlch meis l é do che l forma n grop de ardi social media manager duc fascegn che dapò didarà nesc comuns a rejonèr su Facebook e Instagram. Chest cors ge permetarà de emparèr un di lurieres più ambii de chest temp.

- Na aventura prejentèda acà vèlch di che à ge permetù a n grop de pascioné fotografis de serèr n cerchie lonch 3 egn, col emparèr a fèr sie liber fotografich d'autor che i à metù ensema endèna l lockdown, descorian



l mond e nosc passà e vardan l prejent demò con si eies.

- N viac per descorir endodanef noscia tradizions de coprativa, con Fassacoop, la storia de Raiffeisen e de nesc consorzies che tel passà, tel prejent e vardan al davegnir, fèsc de la colaborazion na ressora amò pech cognosciuda, beleche n scoop maraveous.

- N viac tel lurier 'liquido', na realtà oramai forta ence chiò, ma con pecia rejies e nesciun lech de lurier da divider, pissà da ments local ensema a n team de referiment per dut l smartworking trentin.

fossa aer projec coscita te noscia val, per nesc joegn». Ben, no demò chisc l é jà projec en esser e proponec da nesc joegn, dai 11 ai 20 egn presciapech, ma i é oramai jà te na fasa de rendicontazion e de valutazion, vertesc per vegnir paé fora per chel che vèrda la pèrt economica di projetisè e doventèr basa staifa ensema a etres tenc projec proponec te chisc diesc egn de lurier, per la adventures del davegnir.

Che les taca ite de firé, col nef bando.

Dalbon na Risola che no se ferma mai.

Stefania Povo

Referenta tecnica de la Risola



La gestion di refudames, en curt



Volesse ge fèr a saer ai sentadins che l'apalt di refudames, sotescrit dal Comun General de Fascia ai 28 de jugn del 2019 e con fazion dal prum de messèl del

2019, fossa jìt fora ai 30 de jugn del 2022.

L'ge era stat dat su a l'A.T.I. che tol ite la firmes Chiocchetti Luigi s.r.l. (mandatèra capogrop) e Elli Chiocchetti Luigi s.r.l. (mandanta), dutes da Moena (A.T.I.), per i servijes de: regoeta, trasport e desgorta/reciclaje del refudam urban e assimilà binà su te Fascia e de gestion di impianc de depojit per 36 meisc.

Con deliberazion del Consei de Procura nr 60/2022 dai 23 de jugn del 2022 l'è stat sperlongià per cinch meisc, dal prum de messèl ai 30 de november, e dapò sperlongià amò fin ai 30 de oril del 2023 spetan de envièr via la neva prozedura de garejèda, de chela che la istrutoria la é stata metuda a jir do da comunicazion de desponibilità manèda da l'APAC per meter a jir l' servije de stazion che dèsc su l'apalt nef.

Martina Pederiva
Conseiera de procura al ambient

Percors formatif per l'assegnazion de la mèlghes

En colaborazion col dr Francesco Gubert e la partezipazion del Dirigent de l'Appag Pietro Molfetta, aon endrezà na lingia de scontrèdes formatives per ge dèr n suport a la Aministrazions e a le ASUC tel meter ju i bandi per la conzescion de la proprietèdes rurèles sun nosc teritorie.

L'obietif prinzipèl del projet l'era chel de fèr cognoscer la soluzions che se pel tor su per passèr da n criteriè de agiudicazion del ben demò aldò de la oferta economica più utegola a n criteriè olache troe l'giust equilibrie la oferta economica e chela tecnica.

Na vida de fèr de chesta sort la é emportanta percheche la porta a na concezion più lèria del patrimoniè da mont, che tol ite ence i pèscoi e la cura de chisc medemi.

Descheche l'è spiegà Gubert, la mencióna, per n muie de egn e a nivel provinzièl, ti contrac de conzescion de la mèlghes e di pèscoi de clausoles che perveide che l'gestor cogn se tor su i adempimenc per la cura

del teritorie, à portà a na maor roina del teritorie.

Tel spezifich endèna la scontrèdes l'è stat rejonà de:

1. prejentazion de la linees vida de la Provinzia de Trent per la gestion de la mèlghes e di pèscoi da mont;
2. analisa de la bona pratèghes te la pianificazion e gestion di pèscoi da mont;
3. aplicazion di contegnui traté tel cajo spezifich de la doi mèlghes de proprietà de l'ASUC de Vich.

Con l'augurie de poder ge dèr n suport concret a la Aministrazions e a le ASUC, tole l'ocasion per fèr a saer che l'relator ne consegnarà n dossier con ite duta la linees vida e i strumenc tecnics per meter ju i bandi e i disciplinaries. Vè vegnarà manà duta la documentazion.

Martina Pederiva
Conseiera de procura al ambient



Intervent de recalificazion del lèch de Sèn Pelegrin

A la fin del meis de setember l'è ruà a compiment l'intervent de recalificazion del lèch de Sèn Pelegrin. L'intervent é stat finanziaà con la ressorces a la leta de la Rei de la Ressorves (35.801,35 euro) enveze l'prozediment per dèr su i lurieres e la direzion di medemi ge é stata data su al Comun de Moena.

L'obietif de dut l'intervent l'era chel de miorèr l'azes e la cognoscenza ambientèla del picol lèch che se troa te la ressorva naturèla de Alochet.

Tel spezifich l'è stat fat chisc intervenc:

1. comedament del percors col tor demez duta la barieres naturèles e artifizièles che no lascèa che rue apede families con carieghes da rodes e persones con pedimenc, defat su na pèrt del troi l'è stat realisà andadoes;
2. l'è stat fat su n pent che ge permet ai vijitadores de veder delvers dut l'lèch e la

besties te l'èga;

3. l'è stat realisà n jech didatich;

4. l'è stat metù tabeles informatives con contegnui de educazion ambientèla.

Personalmenter son n muie contenta che sion stac bogn, de gra a la sinergia anter l'Comun General de Fascia e l'Comun de Moena, de portèr a compiment l'intervent che à recalificà n scito de gran beleza ma soraldut percheche l'è stat n investiment che à metù al luster l'conzet de 'montagna inclusiva'.

Tole chesta ocasion per ge sporjer l'developai a l'Aministrazion de Comun de Moena, la firma che à realisà l'intervent, l'Forestal dr Giovanni Martinelli desche projetist e i colaboradores del Comun General de Fascia.

Martina Pederiva
Conseiera de procura al ambient



Cordanzas per l turism e noscia economia



Doi di dessegnes de la formies de Fabio Vettori che moscia i desvalives aspec touc dant da l'APT de Fascia tel Pian Strategich 2023-2025. La mobilità l é un di 7 pilèstres fundamentèi.

En jebia al prum de dezember l'Apt de Fascia l'à chiamà ite la radunanza di sozi. Te chesta ocazion l é stat prejentà e aproà l Pian Strategich 2023-2025 che l é fat da set pilèstres: l prodot, la comunicazion, l 'look and feel', l web, la mobilità, i evenc e l raport coi sozi.

Te mia encèria de Conseier de Procura al turism e raprezentant del Comun General e de l'Aministrations di Comuns de Fascia tel Comitad Esecutif de l'Apt é tout pèrt ativamente ai vèsc per la costituzion de chisc setores de intervent e più avisa per chel che vèrda l prodot olache son en contat strent con l responsabol te Apt Nicolò Weiss.

Te mie intervent te la radunanza de l'Apt é volù uzèr fora la valuta e l'importanza de la colaborazion anter l publich e l privat. L

prodot turistic, l vero 'autist' de na moderna Apt, l é un di pilèstres più emportanc, l vegn creà sul teritorie che se sà ben l vegn gestì dal publich.

L'Apt pel moscèr la prospetives e la tendenze del marcià, la pel troèr fora la formes de comunicazion più adatèdes e i evenc più percacenc per uzèr fora l teritorie, en sinergia con i operadores. L publich enveze l cogn vardèr de creèr tel limit de sia possibilitèdes i plans de svilup adatè per sostegnir na prospetiva sul teritorie. L'encèria donca del Comun General de Fascia e de l'Aministrations l é chela de mantegnir n leam strent e strategich con l'Apt travers na gestion ascorta a creèr la condizions percheche i investimenti sie aldò del Pian Strategich.

N Pian che met dant n mudament epocal ajache se passa da la promozion a la creazion de prodoc per l teritorie. Sun chest troi l é ence la colaborazion per l projet "Sa Mont", de chest podede lejer tel intervent del Conseier de Procura Giorgio Dorich che ve spiega coche l se à svilupa chest istà. Sun chest projet aon lurà en sinergia percheche nosc teritorie vegne rencurà per noscia jent e nesc ghesc.

En sinergia con l'Apt de Fascia l é ence la mobilità e donca l servije de skibus. No l é turism senza servije de mobilità e per chest l é emportant che se colaboree per n servije percacenc e efizient, vardan ence a la sostegnibilità, te n teritorie che l é patrimoniè del Unesco.

No da demanco l é la pèrt che revèrda la

cultura e donca la comunicazion: l Comun General travers si finanziamec l pel didèr la promozion de noscia tradizions, de nosc lengaz e de nosc teritorie.

Vivon te n teritorie che vif de turism e cognon fèr de chesta ressorsa l valor de nosc prejent e de nosc davegnir.

Ence per chel che vèrda l setor del comèrç aon en projet vèlch scomenzadiva emportanta, valguna de chestes ence en sinergia con l'Apt de Fascia, ma de chest ve faron saer miec l an che vegn. Ben segur noscia atenzion la é semper auta tel sostegnir e ge dèr emportanza a noscia economia locala.

*Riccardo Donei
Conseier de procura al bilanz,
turism, comèrç e artejanat*

Projet "Sa mont"



Volessè portar dant i resultat che se à arjont con l projet "Sa mont" che descheche se sà, l é stat metù en esser de gra a l'Apt – e tel specifich te le persone de Nicolò Weiss de Bastianela e Mara Dorich de Coloc – ai enc teritoriai de la val, donca Comun General, Comuns e Frazions, e a la Sat de Trent. L projet l é pontà demèz ai 9 de mè e l é jìt inant encin ai 23 de setember.

Recorde che l'enciarìa de la manutenzion de part del teritorie de la Val la é stata data su a Daniele Iori da Dalba e l auter toch l ge é stat dat su al grop di Menacrepes de Fascia. En dut l é stat spartì te 3 atività maore:

- Dant de dut l é stat librà fora, soraldut da le piante rebaltade, o metù en segurezza i troes do l invern.

- Via per la sajona da d'istà l é stat soraldut netà su e rencurà su i troes da le scoadie e l é stat seà su canche l era de besegn. L é stat rencurà su passa 200 km de troes con passajes una o doi oute en setemana ti lesc più batui. L é stat comprà ite 50 pai de larsc per mudar fora chi de le tabele che menciaa o i se aea enmarcì e con la SAT l é stat fat soralesc per

veder l besegn de intervenc straordinares sul Pas de Vaiolon, al Friedrich August, e olache vegnarà realisà n nef troi per l refuge Valacia ti Munciogn. Mencia amò n soralech sul Vièl del Pan envers Fedaa.

- L é stat fat intervenc straordinares canche se à palesà l besegn: bater ju piante, o anter i autres, per eejemie, meter endò en दौरa e en segurezza i troes descheche se à cognù far do la gran aluvion dai 5 de aost per l troi che da Vich rua sun Ciampedie. Per chest lurier ge vel ge dir n gran devalpai ence ai forestai e a la sozietà portamont Catinaccio che à dat n gran aiut.

En dut l é stat spenù 87.000 euro per le enciarie a Iori e ai Menacrepes e autres beleche 8000 euro de materiai, remborsc viages e jolier e formazion.

Anter le autre atività va sottrissà na bela scomenzadiva che à revardà l raion del Bufaure, olache en colaborazion co la sozietà portamont Bufaure l é stat endò metù en दौरa l troi che da Sela Brunech rua sun Col Bel e do l va ju te Jumela.

Anter l muion de atività che l é stat fat via per

d'istà, volessè tinultima far a saer che l é stat fat giornade de formazion de le doi squadre dessema a la Sat de Trent, dant teoriche e do pratgehe: chest de segur per miorar la calità di intervenc.

Tinultima crese de poder dir che l bilanz del

projet l é più che positif e l porta na gran sodesfazion dalajache l scomenza a esser semper più strutura e l portarà semper de più de gregn resultat.

*Giorgio Dorich
Conseier de procura a trasport e troes*



L lurier del Consei General



Stimé sentadins de Fascia

desche President del Consei del Comun General de Fascia, é piajer de ve portèr dant chel che l'è stat l'urrier del Consei General tel an 2022.

I conseieres é stac chiamé a tor pèrt al Consei set outes, ai 11 e ai 29 de mèrz, ai 10 de mé, ai 9 de jugn, ai 2 de aost e doi outes tel meis de november, ai 9 e ai 30.

Sessaben che vèlch outa l'Consei cogn esser chiamà ite ajache l'è termegn che no se pel lascèr endò, desche l'aproazion del bilanz, del rendicont finanzièl o de convenzions che lea l'urrier del Comun General a chel de etres enc

o istituzioni.

Autra outes enveze, vegn chiamà ite l'Consei, per descorer fora argomenc che veit i conseieres maormenter touc ite te sia pèrt ajache i à l met de se fèr prumes interprec di temes. De chisc ultimes, voi portèr dant chi che amedit merita de esser cognosciui.

- Ai 11 de mèrz, l'è stat portà dant dal Grop de maoranza na mozion a sostegn de la popolazion ucraina aproèda da dut l'Consei.
- Tel medemo Consei l'è stat fat n pas emportant, co l'aproazione del regolament de la Consulta de Fascia per la valiva oportunitèdes. Document chest, metù ju dal

lurier de la Comiscion Afares Istituzionèi. La nomines di raprejentanc les é states portèdes dant tel Consei dai 2 de aost.

- Ai 10 de mé, tel orden del di, l'è stat portà dant doi ponc de valuta per chel che vèrda la gestion di Servijes sozio-educatives per i fantolins, (regolament portà dant ai 2 de aost) e del Servije Tagesmutter.

- Ai 30 de november, l'Grop de mendranza à portà dant na mozion en cont de la firmes de hotie dal post, comedèda tel Consei aldò de n emendament prejentà dal Grop de maoranza, la é stata aproèda con duc a una.

- Tel medemo Consei, semper aldò del lurier

fat da la Comiscion Afares Istituzionèi, l'è stat portà dant e aproà da duc, l'Regolament per durèr l'blason, la bandiera del Comun General de Fascia e la medaa del Procurador. Tole l'ocajion per ge sporjer n ringraziament a duc i Conseieres e al Procurador per l temp che i à dedicà a sia encèria, al Secretèr Elisabetta Gubert e a duc i lurieranc del Comun General per l'urrier fat.

A duta la Jent de Fascia, i miore augures de bona festes e de bon lurier.

Cristoforo Debertol

President del Consei del Comun General de Fascia

L'atività de la Comiscion afares istituzionèi del Consei General

Da n an e mez da canche la é stata metuda a jir, de jugn del 2021, la Comiscion afares istituzionèi del Consei General del Comun General de Fascia la se dèsc ju per ge dèr corp e sostanza al Statut de chest ent, ge stajan do ai besegnes che muda col temp. Tolan sbunf da l'ultima edizion de chest boletin, te la pruma pèrt del an 2022 l'era stat metù en esser la Consulta de Fascia per la valiva oportunitèdes, che l'è vedù, de aost del 2022, la nomina di componenc aldò de l'art. 4 del regolament: chest à dat na azelerazion dezisiva per realisèr la miscion che l'Statut l se met dant.

Anter i lurieres de la Comiscion, conscidran l mudament di tempes e de la modalitèdes de se scontrèr portà da la pandemia, l'è stat integrà duc doi i regolamenc che disciplina l funzionament del Consei General e de Procura, per ge dèr l met a chisc orghegn

de se scontrèr enca a na vida telematica. Se trata de modifiches de natura tecnica ma che à na valenza sostanziala tel fèr doventèr più efizient l lurier de la doi adunanzes canche l'è senester se scontrèr de persona. Enca chest pont l'è stat aproà dal Consei General dai 2 de aost del 2022, aldò de la prozedura perveduda dal Statut per modifichèr i doi regolamenc, per chela che ge vel domanèr n parer dantfora ai Comuns che fèsc pèrt del CGF.

Aldò de chel che vegn dit tel "Codice degli Enti Locali" de la Region Autonoma Trentin-Südtirol, e dò esser stat aproà da la Jonta de la Provinzia de Trent, l'blason de nosc ent l'aea de besegn de esser encadrà te n regolament, aproà dal Consei General. Con chesta prozedura la Comiscion afares istituzionèi ti ultimes meis l'è integrà l

sboz del regolament che disciplina la doura del blason, la conzescion del patroziniè e la doura de la bandiera del CGF, dessema a la medaa del Procurador, desche cef de l'aministrazion del ent. Aldò del Statut, la bandiera del CGF l'è chela dai set colores, che vegn durèda no demò te ocasions istituzionèles ma enca ti dis de valuta storica per la comunanza fascèna. Chesta l'è na particolarità che caraterisea l'CGF desche istituzion, ajache per i Comuns na bandiera no la vegn perveduda. Amò apede, de gra a la medaa, al Procurador ge vegn dat l met de aer n segn de recognosciment visif te anter la outra istituzioni te la ocasions de raprejentanza del CGF.

Tinultima, col obietif de l portèr dant al Consei General te la pruma pèrt del 2023, la Comiscion afares istituzionèi à metù en

esser n regolament che l perveit na lingia de criteries ogetives per l'erogazion di contribuc a la sociazions del sport che l'è sul teritorie del Comun General. Chesta costion la é tant emportanta per Fascia e sia realtèdes sportive, ma enca no sorida da fèr fora ajache noscia Comiscion la pel dèr n prum input e do ge vel valutèr che i Comuns posse sostegnir chesta scomenzadiva tel Consei di Ombolc e la meter en doura.

Chesta ultima prospetiva desmostra belimpont coluna che l'è la funzion del CGF per noscia comunanza, chela de traslatèr i besegnes di Comuns e di sentadins tras scomenzadives politiches che vae a miorèr l bonstèr de noscia jent.

Francesco Gabrielli

President de la Comiscion afares istituzionèi del Consei General

Grop Consiliar FASSA

Te chesta edizion del boletin del Comun General, nosc grop consiliar à l piajer de ve meter dant l'ultima mozion che aon prejentà e che dapò, con vèlch mudament da pèrt de la maoranza, é stata aproèda duc a una.

La mozion en costion era su la situazion di hotie de Fascia. Semper più de spes l'è hotie storic che vegn seré, l passaje de proprietà envers gestions che vegn da fora provinzia e la mencianza de prospetives per strutture alberghieres oramai arbandonèdes da egn. L'cruzie di operadores l'è per n mudament tel sistem che l'è evident se analison la composizion del patrimoniè alberghier te Fascia.

Storicamenter Fascia é caraterisèda da na conduzion alberghiera de familia e del post che investesc te sia struttura bona pèrt del vadagn, che investesc endò sul teritorie bona pèrt del utol e che é a contat strent con la dinamiche soziales e culturèle de la Comunanza. L'è senester enveze pissèr che chi che rua demò per la gestion e/o per la compra de strutture alberghieres lurasse con la carateristiche dites sunsora. E l'è chest l mudament che cruza i operadores del setor e che cognessa fèr cruzièr enca la istituzioni: se risia de veder vegnir più puret l patrimoniè economic (con ressorses vadagnèdes te val

e dapò portèdes te etres teritories), ma enca culturèl e sozietàl, de noscia val.

L'è per chest che l'Grop Consiliar FASSA à domanà:

- n studie per valutèr se l fenomen l'è dalbon te val e cotant gran che l'è;

- l'istituzion de n desch de lurier anter operadores e istituzioni, tolan ite la sociazions de categoria, per pianifichèr azions a sostegn de l'imprenditoria del post, enca col valutèr de sostegnir e engaissèr modie organisatives desche chel de le public company per blocchèr l trend en esser.

Cherdon che l'Comun General de Fascia cogne se fèr portaousc di cruizes de sia Comunanza e che l'aece l doer de coordinèr e sostegnir azions olache l'è spazies 'no ocupé' da etres enc e istituzioni.

L' turism l'è n element che seghita a mudèr, chest no vel dir però che se cogne semper se adatèr ai mudamenc: se cogn saer i gestir, antizipèr canche l'è possibol, studièr.

L'Grop FASSA l'è fat de persones che vif di per di l setor e segur aron l eie ascort sui temes leé al mond economic.

Matteo Iori

Capogrop del Grop Consiliar FASSA

Grop Consiliar CORDANZA

L'atività del grop de maoranza - con 6 conseieres - del Consei General la se à dejout sun desferenc fronc ti ultimes meis, ajache jà dal scomenz del an nosc grop se aea dat ju tras doi mozions con obietives no sorii: la pruma l'aea l zil de empegnèr l Consei de Procura a meter a jir n mecanisim operatif de acolièza e assistenza di enfughè de l'Ucraina do l scomenz de la vera te chel Paisc, la seconda empegnèa l Consei de Procura a ge domanèr a la Jonta de la Provinzia Autonoma de Trent de perveder, tel dessegn de lege de assestament del bilanz de previjion de la P.A.T. per l 2022-2024, la proponeta che l'era stat aproà a l'unanimità tant dal Consei General che dai Ombolc de Fascia a la fin del 2021, per ge trasferir al CGF l 10% de la steora de sojornanza tutta su te val, per finanzièr i projec de enteres generèl che califichea l teritorie e l'identità de la jent ladina che caraterisea la perferida turistica locala.

De gra al lurier del Procurador e di Conseieres de Procura, sostegnui da noscia maoranza te Consei General, l'è stat portà inant scomenzadives e projec che vèrda al davegnir, sun duc chel de la coa di picioi - portèda inant col contribut sostanzial del Comun de Soraga e del Consei di Ombolc - desmostran che l'CGF l'è pel se tor su encèries strategiches, ma che chestes pel esser metudes a jir demò se l'è sinergia anter la pèrts e na vijion fona su

la politiches per miorèr la calità de vita di sentadins de Fascia.

Belapontin tel Consei General ai 30 de november 2022 se à rejonà de n'otra costion a chela che l'grop Cordanza - desche enca dut l'Consei de Procura - l'è sensibol: l compartiment di hotie e de duc i servijes aldò che l'è sun nosc teritorie l'è na emportanza fondamentèla no demò per noscia economia ma enca per tegnir ensem la rei sozietàl che l'è te Fascia. Do na proponeta de la mendranza, te Consei General nosc grop l'è jit tel fon de la costion, vardan semper de tegnir cont di mesi che noscia aministrazion l'è a la leta. Per chest l'grop Cordanza à portà dant na proponeta de mudament de la mozion de la mendranza per perveder che vegne portà inant la enrescida, jà scomenzèda dal Consei de Procura al Turism del 2021, per verificèr se dalbon l fenomen de la gestion foresta di hotie te Fascia fèsc a na vida che na gran pèrt del vadagn de chesta ativitèdes vegn investida fora de ca. Estra apede, nosc grop à volù sottrissèr che l'CGF pel aer na funzion de coordinament e sensibilizazion envers chesta problematiche, tolan ite tant la sociazions de categoria e i operadores locai che la Provinzia de Trent, ajache chest fenomen no caraterisea demò Fascia.

Francesco Gabrielli

Capogrop del Grop Consiliar CORDANZA